



# basic education

Department:  
Basic Education  
**REPUBLIC OF SOUTH AFRICA**

## **SENIORSERTIFIKAAT-EKSAMEN/ NASIONALE SENIORSERTIFIKAAT-EKSAMEN**

**GESKIEDENIS V1**

**2021**

**ADDENDUM**

**Hierdie addendum bestaan uit 14 bladsye.**

**VRAAG 1: HOE HET DIE VERENIGDE STATE VAN AMERIKA IN 1962 OP DIE ONTPLOOIING VAN SOWJETMISSIELE NA KUBA GEREAGEER?****BRON 1A**

Die bron hieronder verduidelik hoe die Verenigde State van Amerika (VSA) in 1962 op die Sowjetunie se ontplooiing van missiele na Kuba gereageer het.

Die beweging (verplasing) van Sowjet-personeel en -toerusting na Kuba het regdeur 1962 die Amerikaanse intelligensiegemeenskap agterdogtig gemaak. In reaksie daarop het Amerikaanse skepe en vliegtuie foto's van elke Sowjetskip wat na Kuba onderweg was, begin neem en U-2-spioenasievliegtuie het begin om gerekende verkenningsvlugte oor die eiland te onderneem.

Die eerste bewyse van die aankoms van grond-tot-lugmissiele, missiele toegerus met torpedobote vir kusverdediging, en groot getalle Sowjet- militêre personeel in Kuba het in foto's uitgekom wat laat in Augustus geneem is. Hierdie foto's het egter geen bewyse van aanvals- ballistiese missiele verskaf nie. Kennedy het in September twee uitdruklike waarskuwings aan die Sowjet-premier, Nikita Khrushchev, gerig oor die opbou van sogenaamde 'aanvals'-Sowjet-wapens in Kuba.

Kennedy het op 13 September geskryf: 'Indien die kommunistiese opbou in Kuba ooit op enige wyse ons veiligheid sou bedreig of daarmee inmeng, of indien Kuba ooit 'n militêre aanvalsbasis met beduidende kapasiteit vir die Sowjetunie sou word, dan sal hierdie land doen wat ook al gedoen moet word om sy eie veiligheid en dié van sy bondgenote te beskerm.'

Ten spyte van Kennedy se waarskuwings het die Russe voortgegaan om basisse te bou en die Verenigde State het voortgegaan om hul aktiwiteite te monitor en foto's te neem. 'n Amerikaanse U-2-spioenasievliegtuig het op 14 Oktober 1962 verskeie foto's geneem terwyl dit oor Kuba gevlieg het. Hierdie foto's het onthul dat die Sowjetunie besig was om missielerreine in Kuba te bou. Dit het die aard van die spel verander en 'n reeks buitengewone gebeurtenisse aan die gang gesit.

[Uit <https://www.archives.gov/publications/prologue/2002/fall/cuban-missiles.html>. Toegang op 17 Februarie 2020 verkry.]

**BRON 1B**

Hierdie bron is 'n uittreksel uit 'n onderhou wat met Robert McNamara gevoer is toe hy vanaf 1961 tot 1968 die Verenigde State se Minister van Verdediging was. Die transkripsie van die onderhou is op 29 November 1998 gedeklassifiseer. Dit beskryf in breë trekke die besluit deur die VSA om 'n vlootkwarantyn op Kuba in te stel.

**ONDERHOUDVOERDER:** Kan jy net kortlik vir my verduidelik hoe die besluit om kwarantyn te in stel, ontstaan het? Ek is nogal geïnteresseerd om oor die gemoedsverandering of meningsverandering in die ExComm te hoor.

**ROBERT McNAMARA:** Die ExComm het eenparig besluit dat, in die belang van die Noord-Atlantiese Verdragsorganisasie (NAVO) se veiligheid, Wes-Europa se veiligheid en Amerika se veiligheid, dit nodig was om druk op die Sowjette te plaas op maniere wat tot die verwijdering van die missiele sou lei. Tweedens wou ons dit doen met so min as moontlik militêre risiko; so min as moontlik militêre risiko met betrekking tot die druk self en so min as moontlik risiko van militêre reaksie nadat daardie aanvanklike stap gedoen is. Daar is geglo dat wat 'n 'kwarantyn' genoem is (wat in 'n sekere sin 'n vlootblokkade was), 'n kwarantyn genoem is omdat 'n kwarantyn minder militêre konnotasie as 'n 'blokkade' gehad het ... daar is geglo dat die kwarantyn die vasberadenheid van die President om toe te sien dat daardie missiele verwijder word, aan Khrushchev sou oordra, sonder om 'n militêre reaksie aan te wakker, en dit is waarom die kwarantyn goedgekeur is.

**ONDERHOUDVOERDER:** Was daar baie besprekings oor wat gedoen sou word indien die Sowjetunie besluit het om die kwarantyn te ignoreer?

**ROBERT McNAMARA:** Ja, daar was, en dit het tot 'n paar baie venynige (onaangename) konfrontasies geleid. Daar is besluit dat ons alle moontlike pogings moes aanwend om die sink van 'n Sowjet-skip te vermy. Daar was 'n beroemde incident wat my en die hoof van vlootkrygsverrigtinge betrek het. 'n Sowjet-skip was besig om hierdie denkbeeldige kwarantynlyn te nader en die vraag was, hoe sou ons reageer indien dit die kwarantynlyn bereik? Die hoof van die vlootkrygsverrigtinge het eintlik gesê dat ons op die skip moes vuur as dit nie sou stop nie. Ek het daarop gereageer deur te sê dat daar nie sonder my persoonlike toestemming op daardie Sowjet-skip gevuur sou word nie, en dat ek dit nie sou gee sonder om die optrede met die President te bespreek nie, want ek en hy was vasbeslote om sover as moontlik militêre optrede te vermy. Soos wat ek voorgestel het, het ons nie aan kwarantyn as militêre optrede beskou nie, maar eerder as 'n middel om voorname en vasberadenheid te kommunikeer, want die President wou daardie missiele verwijder hê met so min as moontlik militêre risiko.

[Uit <https://nsarchive2.gwu.edu/coldwar/interviews/episode-10/mcnamara2.html>. Toegang op 9 Januarie 2020 verkry.]

**BRON 1C**

Die foto hieronder toon 'n groep Amerikaanse vroue wat lid was van die 'Women Strike for Peace'-beweging, wat op 23 Oktober 1962 buite die Verenigde Nasies (VN) se gebou geprotesteer het. Die foto is deur Phil Stanzola geneem en het in die *World Telegram*- en *Sun*-koerante verskyn.



President Kennedy wees versigtig

Vrede of sterwe

Laat die VN die Kubaanse krisis hanteer

[Uit <https://images.app.goo.gl/e5u154rjea2JPqEZ6>. Toegang op 15 Januarie 2020 verkry.]

**BRON 1D**

Die bron hieronder is deel van 'n brief wat President N Khrushchev op 24 Oktober 1962 aan President JF Kennedy geskryf het. Dit verduidelik die Sowjetunie se reaksie op die Amerikaanse vlootkwarantyn van Sowjet-skepe wat van plan was om Kuba binne te vaar.

**Geagte mnr. die President**

... Stel jou voor, mnr. die President, wat as ons jou 'n ultimatum sou gee soos wat jy aan ons met jou optrede gegee het. ... Jy, mnr. die President, verklaar nie kwarantyn nie, maar is eerder besig om 'n ultimatum uit te reik, en jy dreig dat jy geweld sal gebruik indien ons nie jou bevele gehoorsaam nie.

... Nee, mnr. die President, ek kan nie hiermee saamstem nie ... Ons eerbiedig streng die beginsels van internasionale reg en handhaaf noukeurig die standaarde wat navigasie op die oop see in internasionale waters reguleer. Ons handhaaf/eerbiedig hierdie standaarde en geniet die regte wat deur alle nasies erken word.

... Ongelukkig kan mense van alle nasies, en die minste van almal die Amerikaners self, as gevolg van sulke malheid geweldig swaarkry. Sedert die ontstaan van moderne tipes wapens het die VSA hulle voormalige ontoeganklikheid (onbereikbaarheid) heeltemal verloor.



... Die Sowjet-regering beskou die skending van navigasievryheid in internasionale waters en die lugruim as 'n daad van aggressie wat die mensdom tot op die rand van 'n wêreldkernmissieloorlog kan dryf. Daarom kan die Sowjet-regering nie die kapteine van Sowjet-skepe wat na Kuba onderweg is, opdrag gee om die bevele van die Amerikaanse vlootmagte wat hierdie eiland blokkeer, te eerbiedig nie. Ons instruksies aan Sowjet-matrose is om die algemeen aanvaarde navigasiestandaarde in internasionale water streng te eerbiedig en om nie een tree daarvan af te wyk nie. En, indien die Amerikaanse kant hierdie regte sou skend (verontagsaam), moet hulle bewus wees van die verantwoordelikheid wat hulle vir hierdie daad sal dra. Wees verseker dat ons nie blote waarnemers van seerowery deur Amerikaanse skepe in die oop see sal wees nie. Ons sal dan van ons kant geforseer word om daardie maatreëls te tref wat ons as noodsaaklik en voldoende beskou om ons regte te beskerm. Vir hierdie doel het ons alles wat nodig is ...

[Uit <http://www.ibiblio.org/expo/soviet.exhibit/x2jfk.html>. Toegang op 15 Februarie 2019 verkry.]

**VRAAG 2: HOE HET KUBA DIE POPULAR MOVEMENT FOR THE LIBERATION OF ANGOLA (MPLA) GEDURENDE DIE ANGOLESE BURGEROORLOG VAN 1975 ONDERSTEUN?**

**BRON 2A**

Hierdie bron is deel van 'n brief wat Kommandant Manuel Piñeiro Losada (Kuba se Adjunkminister van Binnelandse Sake) in Julie 1975 aan die Kubaanse Minister van die Rewolusionêre Gewapende Magte geskryf het. Dit fokus op hoe Kuba van voornemens was om die Popular Movement for the Liberation of Angola (MPLA) te ondersteun.

Ons bespreek nou al vir 'n geruime tyd die moontlikheid om Angola binne te gaan met die doel om die rewolusionêre bewegings in daardie land te leer ken. Hierdie bewegings was 'n geheim, selfs vir daardie sosialistiese lande wat aansienlike bystand (hulp) aan hulle verleen het. Ek beskou dit nie as noodsaaklik om die strategiese belangrikheid van hierdie lande te verduidelik nie.

Ons kamerade in die MPLA het in Mei die volgende van ons versoek:

- Dat ons 10 mans in Kuba in guerrilla-oorlogvoering oplei, met inagneming van die positiewe ervarings wat hulle gehad het met mense wat in Kuba opgelei is (hulle is die leiers van verskillende guerrilla-magte).
- Dat ons 'n bemanning stuur om 'n DC-3 (vliegtuig) vanaf Zambië of die Kongo na Angola te vlieg wat toerusting vir die guerrilla-magte sal vervoer. Hulle het verduidelik dat as gevolg van die groot afstande tussen die Noordelike Front en die grense met Zambië en die Kongo, dit uiterst moeilik is om die voorraad oor land vol te hou en dat dit vanaf daardie front is waar hulle kontakte het en aktiwiteite in die hoofstad Luanda beplan wat militêr en polities belangrik is
- Hulle wil 'n hoëvlak-afvaardiging na Kuba stuur om betrekkinge met ons Party te bespreek.

Ons het voorgestel dat dit 'n goeie idee sou wees om van ons kamerade na die binneland van Angola te stuur om die terrein (landskap) te leer ken en om 'n film te maak, waartoe hulle ingestem het en hulle het voorgestel dat hulle versoeke uitgestel word totdat ons afvaardiging sou terugkeer. Die afvaardiging sal deur 150 troepe onder die leiding van een van die bevelvoerders wat in Kuba opgelei is, beskerm word ...

Kommandant Manuel Piñeiro Losada  
Adjunkminister van Binnelandse Sake

[Uit <https://narchives2.gwu.edu/NSAEBB/NSAEBB67>.  
Toegang op 8 Januarie 2020 verkry.]

**BRON 2B**

Die bron hieronder is geneem uit *Conflicting Missions – Havana, Washington, Pretoria* deur P Gleijeses. Dit verduidelik die militêre ondersteuning wat Kuba in 1975 aan die MPLA verskaf het.

Nadat 'n reeks vergaderings met Agostinho Neto, die leier van die MPLA, gehou is, het die hoof van die Kubaanse kontingent (groep), Brigadier-generaal Raul Diaz Argüelles, en sy span planne opgetrek vir die implementering van 'n Kubaanse opleidingsprogram wat aan al Neto se vereistes sou voldoen. Die opleidingsprogram, soos voorgestel deur Argüelles, het 480 Kubaanse deskundiges ingesluit asook die daarstelling van vier kampe in Angola wat in Cabinda, Salazar (N'Dalatando), Benguela en Henrique de Carvalho (Saurimo) geleë sou wees. Die Kubane sou oor die volgende ses maande 4 800 MPLA-rekrute tot 16 infanterie-(voetsoldate)-bataljonne oplei en 25 mortierbatterye sowel as verskeie lugafweereenhede verskaf.

'n Verkenningsparty van hierdie Kubaanse Militêre Missie in Angola (Misión Militar Cubana en Angola – MMCA), onder bevel van Argüelles, het op 21 Augustus 1975 in Luanda aangekom. Argüelles sou direk rapporteer aan die Eerste Adjunkminister van die Cuban Revolutionary Armed Forces (FAR), Generaal Abelardo Colomé Ibarra, wat in algehele beheer van die operasie was.

Volgens die oorspronklike plan sou 191 Kubane na die kamp in die Cabinda-enklawe (ingeslote grondgebied) onder die bevel van Generaal Ramón Espinosa Martín, gestuur word. Die oorblywende 270 sou gelyk verdeel word onder die oorblywende drie kampe. Die rede vir die relatiewe groot kontingent Kubaanse soldate wat na Cabinda ontplooi is, was hulle kwesbaarheid (blootstelling) vir 'n aanval deur die FNLA en sy Zaïrese bondgenote.

Die eerste 70 Kubane van die Cabinda-kontingent (afvaardiging) het op 30 September 1975 vanaf Havana via Barbados en Bissau na Brazzaville gevlieg waar hulle na 'n Kongolese Antonov-vliegtuig oorgeplaas is vir 'n kort vlug na Pointe-Noire en hulle reis na Cabinda padlangs voltooi het. Die Kubaanse weermag het op Afrikabodem aangekom en dit sou nie lank neem voordat hulle met die SAW en sy bondgenote, die FNLA en UNITA, swaarde sou kruis nie.

[Uit *Conflicting Missions – Havana, Washington, Pretoria* deur P Gleijeses]

## BRON 2C

Die bron hieronder beskryf in breë trekke hoe Kuba in 1975 sy eerste groep soldate na Angola ontplooい het. Dit is deur 'n Colombiaanse skrywer, Gabriel Garcia Marquez, geskryf en het op 12 Januarie 1977 in *The Washington Post* verskyn.

Op 7 November 1975, op die vooraand van Angola se onafhanklikheid van Portugal, het Kuba 'n grootskaalse militêre ingryping, Operasie Carlota, van stapel gestuur om die MPLA te ondersteun. Hul missie was om die aanvallers terug te hou sodat die Angolese hoofstad nie in die hande van die vyand sou val voordat die Portugese onttrek het nie, en om dan die weerstand vol te hou totdat versterkings opdaag. Operasie Carlotta het begin met die stuur van 'n versterkte bataljon van spesiale magte, bestaande uit 650 lede. Hulle is oor 'n tydperk van 13 dae ingevlieg uit die militêre afdeling van die Jose Marti Lughawe in Havana na die lughawe in Luanda wat steeds deur Portugese troepe beset is.

Die eerste kontingent (groep) het om 16:00 op 7 November op 'n spesiale vlug van Cubana de Aviacion vertrek, op een van die legendariese Bristol Britannia 318-vliegtuie wat die Engelse vervaardigers opgehou vervaardig het en die res van die wêreld opgehou gebruik het.

Die passasiers was almal in somersklere, sonder militêre kentekens (wapens), geklee en het aktetasse en gewone paspoorte met hul regte name en identifikasie gedra.

Die lede van die spesiale bataljon was goed opgeleide krygers met 'n hoëvlak van politieke en ideologiese vorming. Maar in hul aktetasse het hulle masjiinpistole gedra en in die vragruim van die vliegtuig was daar 'n aansienlike (groot) vrag ligte artillerie, kleingewere, drie 75 mm-kanonne en drie 82 mm-mortiere in plaas van bagasie.

[Uit <https://www.bajanthings.com/operation-carlotta--cuba-secret-flights-to-angola-via-barbados/>. Toegang op 7 Januarie 2020 verkry.]

## BRON 2D

Die foto hieronder is op 3 November 2015 geneem. Dit toon lede van Kuba se militêre lugteenhed wat na Angola se 40ste herdenking van Operasie Carlota uitgenooi is. Die fotograaf is onbekend.



[Uit <https://repeatingislands.com/2015/11/03/cubanangola40-rethinking-the- 1975-african-cuban-war/>. Toegang op 25 September 2020 verkry.]

Agostinho Neto

Fidel Castro

**VRAAG 3: WATTER ROL HET ELAINE BROWN GEDURENDE DIE 1960's EN 1970's IN DIE BLACK PANTHER-PARTY GESPEEL?****BRON 3A**

Die bron hieronder is in September 1977 deur John Simkin vir *Spartacus Education* geskryf. Dit verduidelik hoe Elaine Brown 'n lid van die Black Panther-party geword het.

Elaine Brown het haar vroeë politieke opvoeding toegeskryf aan Jay Kennedy, 'n lid van die Amerikaanse Kommunistiese Party, en die klavierlesse wat sy in die somer van 1967 by die Watts-behuisingprojek aangebied het. Haar ervaringe by Watts het as 'n sosiale en rasste-ontwaking gedien en Brown het later vir die radikale Afro-Amerikaanse koerant, *Harambee*, begin skryf. Brown se eerste direkte blootstelling aan die Black Panther-party (BPP) het deur plaaslike pleidooie (versoeke) vir die Huey Newton Legal Defence Fund gekom.

Brown het, as 'n lid van die Los Angeles-tak van die Black Panther-party, gehelp om die party se eerste Gratis Ontbyt vir Kinders-program buite Oakland, Kalifornië, te stig. Brown het teen 1971 die redakteur van die party se koerant, *The Black Panther*, geword en is spoedig as die eerste vroulike lid van die Panther Central Committee aangestel. In opdrag van Huey Newton het Brown in 1973 haar eerste poging aangewend om deel te wees van die Oakland City Council, saam met Bobby Seale se poging om burgermeester te word. Alhoewel nie Brown of Seale verkies is nie, het beide groot steun van 'n polities herleefde swart Oakland-bevolking ontvang wat tot 'n uitbreiding van die Panthers se kiesafdeling (kiesers) gelei het.

Huey Newton het in 1974 Bobby Seale, die medestigter van die Black Panther-party, uit die party ontsetel (uitgedryf) en twee dae later is Brown in die posisie van voorsitter van die Black Panther-party aangestel.

Toenewton na Kuba gevlug het, het Brown haar posisie as leier van die mans-gedomineerde party gekonsolideer (versterk) en daarvan gewerk om die Panthers se rewolusionêre programme te herdefinieer om die aspirasies (wense) van swart vroue in te sluit.

[Uit <https://www.spartacus-education.com>.  
Toegang op 9 September 2020 verkry.]

## BRON 3B

Die bron hieronder fokus op Elaine Brown, voorsitter van die Black Panther-party (BPP) wat op 6 Augustus 1974 lede by 'n vergadering in Oakland, Kalifornië, toespreek het.

Elaine Brown het haar posisie as die eerste vroueleier van die Black Panther-party aanvaar. Omring deur veiligheidspersoneel op die verhoog, het sy in die gehoor van die partylede ingekyk en met twee kort (saaklike) sinne haar plek in swart Amerikaanse geskiedenis ingeneem. 'Ek het al die wapens en die geld. Ek kan 'n uitdaging van buiten en van binne weerstaan,' het Brown aan die BPP-lede gesê volgens haar 1992-lewensbeskrywing, *A Taste of Power: A Black Woman's Story*. 'Ek het julle nie saamgeroep om dreigemente te maak nie, Kamerade. Ek het eenvoudig hierdie vergader belê om julle in te lig oor die realiteit van ons situasie. Die feit is dat Kameraad Huey Newton in ballingskap is. Die volgende feit is: ek neem sy plek in totdat ons dit vir hom moontlik maak om uit Kuba terug te keer.' Dit was oopsigself rewolusionêr vir die Panthers om 'n vrou aan te stel om die party te lei.

Sy het gewaarsku teen 'n omverwerping (oorname) deur te sê: 'Indien jy so 'n indiwidu is, moet jy eerder hardloop en vinnig ook. Ek, as jou voorsitter, die leier van hierdie party, ek sal nie toelaat dat my leierskap uitgedaag word nie. Ek sal ons party bo- en ondergronds lei. Ek sal die party lei, nie net vir die bevordering van ons doelwitte nie, maar ook in die verdediging van die party deur enige en alle maniere moontlik.'

Elaine Brown se kragtige toespraak aan lede van die Panthers het haar goeie leierskapvaardighede getoon. Sy was nie bang om 'n ferm standpunt in te neem en om haar manlike ampsgenote uit te daag nie. Brown het as inspirasie vir die swart Amerikaanse jeug en vroue in besonder gedien ...

[Uit <http://www.washingtonpost.com/news/retropolis/wp/2018/01/19/i-have-all-the-guns-and-money-when-a-woman-led-the-black-panther-party/>. Toegang op 17 September 2020 verkry.]

**BRON 3C**

Die foto hieronder toon hoe Elaine Brown, leier van die Black Panther-party, Huey Newton in die Verenigde State van Amerika terugverwelkom nadat hy na Kuba verban is. Die foto is op 14 Julie 1977 deur Jim Palmer vir die Associated Press (AP) op die San Diego Internasionale Lughawe geneem.



[Van <http://www.washingtonpost.com/news/retropolis/wp/2018/01/19/i-have-all-the-guns-and-money-when-a-woman-led-the-black-panther-party/>.  
Toegang op 18 September 2020 verkry.]

## BRON 3D

Die bron hieronder is deel van 'n onderhoud wat op 14 Oktober 1988 deur Louis Massiah en Terry Rockefeller, namens die Washington University Libraries, met Elaine Brown gevoer is. Dit fokus op die uitdagings wat die Black Panther-party in die oë gestaar het.

**LOUIS MASSIAH:** Wat het dit beteken om 'n Black Panther te wees? Wat was 'n Black Panther?

**ELAINE BROWN:** Wel, as 'n individu, het dit beteken dat jy jou lewe moes verbind. Ons moes iets van onsself opgee, ons lewens.

**LOUIS MASSIAH:** Hoe het daardie jaar, 1969, begin?

**ELAINE BROWN:** Wel, dit het met die sluipmoorde op John Huggins en Bunchy Carter in Los Angeles begin. En ek, ek het elke maand 'n begrafnis bygewoon. Ag, ek het 'n professionele sanger by begrafnisse geword. E Hoover, die fascistiese Direkteur van die Federale Speurdiens (FBI), het aan die begin van daardie jaar aangekondig dat dit die laaste jaar sou wees dat die Black Panther-party sou bestaan. En ons het geweet dat ons dit sou moes konfronteer. Ons het wat ons die Executive Mandate Number One genoem het, wat bepaal dat geen Panther ooit kon toelaat dat hy/sy 'n geweer verloor nie.

**LOUIS MASSIAH:** Vertel ons meer van die sterfes.



**ELAINE BROWN:** Wel, 1969 was 'n baie moeilike jaar vir almal van ons in die Black Panther-party. Maar ons het gedink dat ons onsself sou kon hanteer. Die Executive Mandate Number One, wat deur Huey Newton uitgereik is, het verklaar dat die Panthers, eerstens, altyd gewapen moes wees, of dit in die strate of tuis was, om onsself daar en dan te kon verdedig. As gevolg van ons aktiwiteite en Hoover se aandeel het ons 'n groot klomp mense verloor. Ek het elke maand in 1969 'n begrafnis bygewoon, dit was geen grap oor wat besig was om te gebeur nie. Maar ons het met ons harte geglo dat ons onsself moes verdedig. En daar was so baie wat huis dit gedoen het. En so baie het teen die einde van daardie jaar gesterf in die klopjag deur die Los Angeles Polisie se SWAT-span op die Los Angeles-kantoor, 'n vyf-en-'n-halfuur-aanval op ons kantore met tenks en semimilitêre gewere, ens. Ons het geweet dat dit ernstig was en dat ons almal sou sterf, maar dit was waaroor ons gegaan het. Ons moes die prys betaal indien ons die voorlopers vir die bevryding van die swart Amerikaners wou wees ...

[Uit [https://digital.wustl.edu/e/eii/eijiweb/bro5427.0311.022marc\\_record\\_interviewer\\_process.html](https://digital.wustl.edu/e/eii/eijiweb/bro5427.0311.022marc_record_interviewer_process.html). Toegang op 19 September 2020 verkry.]

## ERKENNINGS

Visuele bronne en ander historiese bewyse is uit die volgende geneem:

Gleijeses, P. (2003) *Conflicting Missions – Havana, Washington, Pretoria* (Galago, Kaapstad)

<http://www.greenleft.org.au/contest/angola-honours-cuba-crucial-contribution-freedom-struggle>

<http://www.ibiblio.org/expo/soviet.exhibit/x2jfk.html>

<http://www.washingtonpost.com/news/retropolis/wp/2018/01/19/i-have-all-the-guns-and-money-when-a-woman-led-the-black-panther-party/>

[https://digital.wustl.edu/e/eii/eiiweb/bro5427.0311.022marc record interviewer process.html](https://digital.wustl.edu/e/eii/eiiweb/bro5427.0311.022marc_record_interviewer_process.html)

<https://narchives2.gwu.edu/NSAEBB/NSAEBB67>

[https://nsarchive2.gwu.edu/coldwar/interviews/episode-10/mcnamara2.html.](https://nsarchive2.gwu.edu/coldwar/interviews/episode-10/mcnamara2.html)

<https://www.archives.gov/publications/prologue/2002/fall/cuban-missiles.html>

[!\[\]\(528617bae5d4722c747678f5759aceb1\_img.jpg\)  
https://www.bajanthings.com/operation-carlotta-cuba-secret-flights-to-angola-via-barbados](https://www.bajanthings.com/operation-carlotta-cuba-secret-flights-to-angola-via-barbados)

[https://www.spartacus-education.com.](https://www.spartacus-education.com)

<https://images.app.goo.gl/e5u154rjea2JPqEZ6>

<https://repeatingislands.com/2015/11/03/cubanangola40-rethinking-the-1975-african-cuban-war/>